



ឧបក្ខមិកា
AWIG-AWIG
រាជានុរាជ
DESA ADAT KUTA



តំបន់ភូមិភាគកូតា
KELURAHAN KUTA
តំបន់មហាភូមិភាគកូតា
KECAMATAN KUTA,
តំបន់បុរាណវិទ្យា
KABUPATEN BADUNG
ចក្រវាលសិវ័យសិវ័យ
TAHUN MASEHI 1992






ឧបិក្ខុបិក្ខា
 AWIG-AWIG
 ្រុយាធិបត្រា
 DESA ADAT KUTA



KELURAHAN KUTA
 គិរិយាធិបត្រា
 KECAMATAN KUTA,
 គុបាបាតាតា
 KABUPATEN BADUNG
 បាបាតាបាតា
 TAHUN MASEHI 1992



DAGING BUKU AWIG-AWIG

DAGING BUKU AWIG-AWIG	pra	2
MURDHA CITTA		1
Sarga I ARAN LAN WEWIDANGAN DÉSA		1
Sarga II PETITIS LAN PAMIKUKUH		2
Sarga III SUKERTA TATA PAKRAMAN		2
Palet 1 Indik Krama		2
Palet 2 Indik Prajuru		6
Palet 3 Indik Pasamuan		7
Palet 4 Indik Kukul		9
Palet 5 Indik Druén Désa		10
Palet 6 Sukerta Pamitegep		11
Kaping 1 Karang Tegal Lan Carik		11
Kaping 2 Pepayonan		12
Kaping 3 Wewangunan		12
Kaping 4 Wewalungan		13
Kaping 5 Bhaya		13
Kaping 6 Penyanggran Banjar		14
Sarga IV SUKERTA TATA AGAMA		15
Palet 1 Indik Dewa Yajnya		15
Palet 2 Indik Resi Yajnya		19
Palet 3 Indik Pitra Yajnya		20
Palet 4 Indik Manusa Yajnya		23
Palet 5 Indik Bhuta Yajnya		24
Sarga V SUKERTA TATA PAWONGAN		26
Palet 1 Indik Pawiwahan		26
Palet 2 Indik Nyapian		29

	Palet 3 Indik Sentana	32
	Palet 4 Indik Warisan.....	33
Sarga VI	WICARA LAN PAMIDANDA.....	36
	Palet 1 Indik Wicara	36
	Palet 2 Indik Pamidanda.....	36
Sarga VII	NGUWAH-NGUWUHIN AWIG-AWIG	39
Sarga VIII	PAMUPUT	39

MURDHA CITTA

A U M, OM

OM Swastyastu, OM Awighnamastu nama Sidham.

Putusing pasébhan krama Désa Adat Kuta, gumawé awig-awig désa pakraman maka sepat siku-siku pamatut, wastu kasidhan prayojanan mami kabéh, prasama angidep muwah amagehakan kadi tata gamaning awig-awig iki.

SARGA I

ARAN LAN WEWIDANGAN DÉSA

Pawos I

- (1). Désa adat puniki mawasta Désa Adat Kuta.
- (2). Jebar kekuwub wewidangania mawasta nyatur :
 1. Sisih wétan Désa Adat Suwung.
 2. Sisih kidul Désa Adat Tuban.
 3. Sisih kulon Segara.
 4. Sisih lor Désa Adat Legian.
- (3). Wewidangan palemahan désané kepah dados 13 (tiga welas) banjar suka duka luiré :
 1. Banjar Pelasa.
 2. Banjar Temacun.
 3. Banjar Pamaron.
 4. Banjar Pengabetan.
 5. Banjar Pering.
 6. Banjar Pandé Mas.
 7. Banjar Tegal.
 8. Banjar Buni.
 9. Banjar Jaba Jero.
 10. Banjar Anyar.
 11. Banjar Segara.
 12. Banjar Tebasari.
 13. Banjar Mertajati.

SARGA II

PETITIS LAN PAMIKUKUH

Pawos 2

Désa Adat Kuta puniki ngamanggehang pamikukuh :

1. Pancasila.
2. UUD 1945, pamekas pasal 18.
3. Perda Nomor 6, tahun 1986 Propinsi Dati I Bali.
4. Tri Hita Karana manut tatwaning Bhuwana Agung.

Pawos 3

Luir petitis désané :

1. Mikukuhin miwah ngrajegang Sang Hyang Agama.
2. Nginggilang tata prawertiné magama Hindu.
3. Ngrajegang pasukertan Désa saha pawongania sekala kalawan niskala.

SARGA II

SUKERTA TATA PAKRAMAN

Palet 1

INDIK KRAMA

Pawos 4

- (1). Sané kabawos Krama Désa inggih punika kulawarga magama Hindu, sampun ...mabanjar suka-duka tur nyungsung Kahyangan Désa Adat Kuta.
- (2). Sajaba punika kabawos tamiu.

Pawos 5

Krama Désa Adat Kuta wénten kalih soroh luiripun :

- (1). Krama ngarep, kulawarga sané sampun mawiwaha tur sampun tedun makrama banjar suka- duka.
- (2). Krama balu, salah sinunggil kulawarga krama ngarep lampus utawi nyapihan.

Pawos 6

Kawit dados krama désa wénten tigang soroh, luiripun :

- (1). Wit sangkaning sampun jumenek ring Désa Adat Kuta.
- (2). Mawiwit ngrereh pangupajiwa ring sawidangan Désa Adat Kuta, utawi wit patilar rahayu saking désa siosan.
- (3). Malarapan antuk pawiwahan pratisentana rancah (1) miwah (2) ring ajeng.

Pawos 7

Panemayan tedun makrama désa.

- (1). Malarapan antuk pawiwahan utawi ngrereh pangupajiwa utawi patilar rahayu saking désa siosan risampun katedunang makrama banjar suka-duka.
- (2). Ngranjing mabanjar suka-duka kamargiang :
 1. Tigang sasih saking upacara pawiwahan.
 2. Asasih saking patilar rahayu warga désa siosan, kadulurin antuk supéksa pailikitan ring prajuru banjar muwah prajuru Désa Adat Kuta.
 3. Tigang sasih saking ngrereh pangupajiwa.
- (3). Suang-suang kulawarga pacang tedun makrama désa, kapatutan ipun :
 1. Sanggup nyiwi kahyangan Désa Adat Kuta.
 2. Tinut saturut ring daging awig-awig, manut parareman désa, saha maduluran upakara daksina pajati ka pura Désa / Bale Agung lan Banjar.
 3. Mopog ngetut ayah pepesuan antuk artha brana manut pararem dwaning kaluasan.

Pawos 8

Sahanan warga désa sami keni ayah-ayahan, luiripun :

- (1). Ayahan ngarep saking krama ngarep.
- (2). Ayahan balu saking krama balu utawi nyapihan.
- (3). Ayahan roban saking krama dandanan waris rancah (1) miwah (2) ring ajeng, sané sampun manggeh daha teruna tur kapupulang dados sekaa deha teruna-teruni.

Tetegenan krama désa sakadi ring sor :

- (1). Krama ngarep keni ayahan miwah pepeson mamungkul.
- (2). Krama balu keni pepeson utawi ayah nyibakin.
- (3). Banjar suka-duka utawi pangampok, keni tetegenan anut wiguna, réh banjar inucap maka tangan sukuning désa.

Pawos 10

- (1). Pradé wénten pakaryan abot sané patut karombo, kéngin rombo antuk suang-suang krama désa utawi nganggén undagi turmaning prabéya kaétang antuk désa.
- (2). Pradé wénten sinalih tunggil banjar suka-duka tan nganutin kadi pasuaraning bawos ring ajeng, wenang idésa niwakang pamidanda.
 1. Satunggil wénten lampus ring ubanjaran inucap keni paletahan panukun sétra, manut pararem Désa Adat Kuta.
 2. Pradé panukun sétra inucap tan katawur mawaneng jantos kalih pasangkepan, kadanda salami tan nawur, tan dados mendem ring sétra Désa Adat Kuta, maka miwah tan polih tirta Kahyangan Tiga Désa Adat Kuta.
 3. Pradé taler kapurug, idésa wusan pawéha sukerta sakaluiré ring banjar inucap utawi kawusang makrama Désa Adat Kuta.
 4. Pradé sang amandel, tumusang ring sang ngawa wenang.
- (3). Pradé salah sinunggil krama Banjar tan anut ngrombo pakaryan désa, wenang ibanjar ngeninin pamidanda manut pararem webanjaran inucap.
- (4). Sajawaning ayah-ayahan désa, krama banjar taler negen ayahan suka-duka ring banjar, pradé kapurug kadosa manut pararem.

Pawos 11

Swadharmaning krama désa siosan ring ayah-ayahan, luiripun :

- (1). Krama désa / banjar :
 1. Dreda atuang ring Désa Adat Kuta.

2. Tinut saturut ring sadaging awig-awig, pasuara lan pararem désa.
 3. Tan maren ngutsahayang mangda désané prasidha nyujur anut petitis.
- (2). Swadharmaning tamiu :

1. Tinut saturut ring sapamargin kértin Désa Adat Kuta.

Pawos 12

Petias utawi ulih-ulihan krama désa kadi ring sor :

- (1). Polih pasayuban prajuru ngamanggehang luih petitis tur kabawosin saha katiwakin pamutus sahanan wicaranya.
- (2). Nyarengin paruman désa / banjar, saha wenang mastikayang pamutus.
- (3). Kéngin manut paétangan, luihipun :
 1. Mapuankid, luput ayah-ayahan désa / banjar, menawita mapawangunan yajnya, matepetin muwah kaluwasan mawaneng awuku.
 2. Nyada, ngamademang ayah-ayahan riantukan sampun wénten panyadé utawi sampun mayusa 70 warsa wiadin pinunas ngraga menawi kasungkunan.
 3. Nyuksukin utawi nyledihinin ayah-ayahan, tur sané kadadosang risampun manggeh deha-taruna, pradé mamurug kadanda manut pararem.
 4. Ngewot (meli ayah) ngentos ayahan saha pepeson antuk arta brana dwaning kaluasan paling kidik nem sasih utawi panemaya ngrereh pangupa jiwa ring tios désa, (makarya ring pemerintah) manut pararem.
 5. Luput tan keni pepeson utawi ayah-ayahan riantukan dados prajuru lan sios punika.

Pawos 13

Wusan dados krama sakadi ring sor :

- (1). Sangkaning magingsir genah ring wewidangan Désa Adat Kuta, kadulurin antuk nunas panugrahan ilikita prajuru.
- (2). Kanorayang (kawusang) antuk banjarania utawi désa manut tata cara.
- (3). Sang wusan makrama tan polih pah-pahan sangkaning druén désa utawi Banjar.

INDIK PRAJURU

Pawos 14

- (1). Désa Adat Kuta kaénter antuk Kelihan Désa Adat.
- (2). Banjar suka-duka kaénter antuk Kelihan Suka-Duka.
- (3). Kelihan Désa lan Kelihan Suka Duka.
 1. Mawiwit saking krama ngarep.
 2. Kaadegang malarapan antuk pamilihan parumania suang-suang, nyabran limang warsa, sajawaning wénten pariindik tios, tur dados kapilih malih.
 3. Maduluran nunas panugrahan / pasaksi ring pura Kahyangan Tiga Désa Adat Kuta.

Pawos 15

- (1). Kelihan Désa Adat kasanggra antuk :
 1. Pangliman pinaka wakilnia, kapilih antuk pararem désa.
 2. Penyarikan pinaka juru surat (ilikita).
 3. Patengen pinaka pangemong druén désa.
 4. Kasinoman pinaka juru arah.
- (2). Dudonan panyanggrané manut abot dangan pakaryané, makadi Kasinoman pakaryané magilir manut paétangan banjar suang-suang.
- (3). Sajeroning ngénterang pasukertan niskala, Kelihan Désa mingsinggihang Pamangku Kahyangan Désa.

Pawos 16

- (1). Swadharmaning Kelihan Désa, luihipun :
 1. Ngénterang palaksanaan sadaging awig-awig, pasuara lan pararem désa.
 2. Nuntun tur ngénterang krama rawuhing warga désa ngupadi anut petitis.
 3. Mawosang kalih niwakang pamutus arep ring wicaran warga désa.
 4. Maka duta désa matemuang bawos ring sapa sira ugi.
- (2). Pradé prajuru nilar sesana, keni pamidanda nikel ring kaiwangan suang-suang krama saha kangkat kararianang manut pararem.

Petias prajuru luih ipun :

1. Luput rerampén miwah pepeson.
2. Apah tigaan saluiring pikolih sané kabagi.
3. Pikolih tiosan manut pararem.

Pawos 18

Prajuru kagentosin riantukan :

1. Séda (lampus).
2. Pinunas ngraga wit rahayu.
3. Nilar sesana.
4. Nganorayang utawi ngentosin prajuru patut kararemin antuk désa sajeroning peparuman (pasamuan).

Palet 3

INDIK PASAMUAN

Pawos 19

(1). Pasamuan / pasangkepan ring Désa Adat Kuta, luihé :

1. Pasamuan désa / banjar, nganut panemaya utawi padgata kala :
 - Pasamuan désa nyabran Kasanga utawi padgata kala.
 - Pasamuan banjar ngasasih (Anggarakasih) apisan utawi padgata kala.

(2). Pasamuan désa / banjar madudonan sakadi ring sor :

1. Kadulurin pangarah, pradé padgata kala, salanturnia maka cihna suaran kulkul anut pawos 23.
2. Prasadha lumaksana risampun katedunin antuk sang patut ngamiletin, abusana nylémpot saha tan kalugra makta gegawan sakaluiré.
3. Tan maren ngarcana Ida Bhagawan Penyarikan maka sarana banten cané.
4. Pangawit kalaksanayang panyacak sép-sépan saha riwusania nyacak dedosan agung alit, manut pararem suang-suang banjar suka-duka.
5. Pamutus bawos gilik saguluk (pararem) punika kamanggehang.

- (3). Pradé pidaging pasamuan tan karareman, mangda prajuru ngilikang bebawos tur ngwaliang malih ring pasamuan pacang kasungkemin, bilih tan prasidha taler ngamanggehang pararem, wenang prajuru nunas bawos ring sang ngawawenang riantuan daging pasamuan inucap wicara ring désa.

Pawos 20

- (1). Sajeroning pasamuan désa / banjar patut kasiarang :
1. Munjuk lungsuring pakraman, makadi ayah-ayah, sulur artha brana, lan siosan punika.
 2. Rencana prajuru ngeninin usaha kapungkur.
 3. Sahanan wicara saha pamutusan.
- (2). Sahanan sané kasiarang ring ajeng patut katiténin saha katiwakin pamutus antuk pasamuan suang-suang,
- (3). Pamutus pasamuan désa / banjar sinanggeh pararem maka pamitegep palaksanaan awig-awig.

Pawos 21

- (1). Sangkepan prajuru patut :
1. Kawéntenang sanistané tigang sasih apisan, bilih-bilih kéngin ngasasih anut wiguna.
 2. Kasarengin antuk sahanan Prajuru Désa lan Kelihan-kelihan Suka-Duka, Dinas, Teruna.
 3. Katuntun antuk Kelihan Désa Adat.
- (2). Sangkepan prajuru kawenangang wantah ngrincikang tata upaya nglaksanayang usaha miwah pangrencana sakaluiré.
- (3). Pamutus sahanan rerancangan, bilih-bilih rencana pacang niwakin tetegenan ring ikrama tan kapatut sadéréng kapikukuh antuk pasamuan désa / banjar anut dudonan.
- (4). Pamutus pasangkepan prajuru mawiwit pituduh sang mawangrat utawi ngoné kang pecak pararem ikrama sinanggeh pasuaran Désa Adat Kuta.

- (1). Pasangkepan Sekaa-sekaa kawéntenang manut wiguna.
- (2). Nangken pasangkepan sekaa patut atur supéksa riyin ring prajuru désa / banjar, mangda prasidha tan lémpas kadi petitis pawos 3 ring ajeng.

Palet 4

INDIK KULKUL

Pawos 23

- (1). Kulkul ring Désa Adat Kuta wénten tigang soroh, luihé :
 1. Kulkul désa magenah ring Pura Désa.
 2. Kulkul banjar suka-duka magenah ring suang-suang banjar.
 3. Kulkul sekaa manut wiguna.
- (2). Suaran kulkul punika kabawosang pasuaran iwadésa wiadin ikrama banjar.
- (3). Tabuh tetepakan kulkul inucap pastika masiosan manut tetujon, luihé :
 1. Tengeran tedun ngayah utawi pasamuan biasa 1 tulud (atulud).
 2. Tengeran wali, nungtit ngawit pujastawan sira mangku utawi sang sulinggih.
 3. Tengeran kapanca bhaya :
 - 1). Jiwa bhaya, upami kabaak / karampok, kalih tulud bulus.
 - 2). Cihna wénten pangamukan, tigang tulud bulus.
 - 3). Geni bhaya upami umah puhun, kulkul bulus nglantur akenyelan.
 - 4). China wénten kablabaran, bulus nglantur akenyelan.
 - 5). Artha bhaya utawi kamalingan / kapandangan, kalih tulud bulus tur kasawurin antuk kulkul banjar sané tiosan.
 4. Tengeran sinalih tunggil warga désa / banjar wénten lampus, kalih tulud biasa.

Pawos 24

- (1). Kulkul désa / banjar tan wenang katepak yan tan sangkaning pituduh prajuru sajawaning tengeran kapanca bhaya.
- (2). Sang nepak tan sangkaning pituduh, patut digelis atur supéksa maka buatan panepaké, yan tan asapunika kadanda manut pararem, asapunika taler pamidandané yan panepaké tan nganutin wiguna.

- (3). Sahanan kulkul banjar sawidangan Désa Adat Kuta patut katepak, pradé wénten sinalih tunggil kulkul banjar nengerang suara kapanca-bhaya, pradé mamurug keni pamidanda banjar inucap gung arta 1000 (siu) wiji jinah bolong.
- (4). Tengeran kapanca-bhaya patut katedunin antuk sahanan ayahan, saha gegawan anut rupan bhayané.
- (5). Kulkul sekaa-sekaa tan wenang nyawurin sukat miwah tengeran kulkul désa / banjar, pradé mamurug kadanda manut pararem désa utawi banjar.

Palet 5

INDIK DRUÉN DÉSA

Pawos 25

Padruén Désa Adat Kuta sakadi ring sor :

- (1). Kahyangan Désa, makadi Kahyangan Tiga, Pura Désa, Pura Puseh, Pura Dalem Kahyangan, Pura Panataran, Pura Panyarikan, Pura Mrajapati, lan siosan punika.
- (2). Sétra wénten lima (5) palebahan, sakadi :
 1. Sétra anak alit dados sétran bebajangan, magenah ring wewidangan Banjar Pemamoran.
 2. Sétra anak alit dados sétran Bikul magenah ring wewidangan Banjar Pandé Mas.
 3. Sétra ageng magenah ring wewidangan Banjar Tebasari, utawi sema kangin, mawasta Sétra Kepuh Rangdu.
 4. Sétra ageng magenah ring wewidangan Banjar Tegal, ring pasisi utawi sema kauh, mawasta Sétra Asem Celagi.
 5. Sétra ageng magenah ring wewidangan Banjar Anyar, pasisi utawi sema Piling-piling, mawasta Sétra Piling-Piling.
- (3). Tanah bukti pura marupa tanah tegalan lan sawah akéhnia : 2 (duang) cutak dué Pura Kahyangan, acutak dué Pura Panyarikan, 2 (duang) cutak dué Pura Puseh, acutak sawah dué Pura Panyarikan, acutak sawah dué Pura Désa. Catetan tanah bukti pura wénten ring lepihan ring ungkur buku awig-awig puniki.

(4). Piranti-piranti Désa luiripun :

1. Wewangunan Kahyangan Désa.
2. Balé Banjar saha Balé Kulkul suang-suang banjar.
3. Margi-margi druén désa sané kaempon tur kapiara antuk banjar manut pararem.

(5). Lelanguan sakadi tetabuhan lan ilén-ilén, luiripun :

1. Kulkul ring Pura Désa saha Kulkul Banjar ring suang-suang banjar.
2. Pacanangan lan patapakan ring pura Kahyangan Tiga.
3. Ilén-ilén wali pura sakadi pepéndétan.
4. Gong kadrué antuk suang-suang banjar ring sawidangan Désa Adat Kuta.

Pawos 26

- (1). Prajuru wenang ngétangang druén désa, kaanggén prabéan wewangunan utawi pangaci ring Pura Kahyangan Désa.
- (2). Nyabran pasamuhan désa / banjar, Patengen patut nyiarang sapamargin druén désa ring krama saha ilikita pastika saking Kelihan kasarengin antuk Panyarikan.
- (3). Sakaluiring padruén désa / banjar patut wénten ilikitania.

Palet 6

SUKERTA PAMITEGEP

Kaping 1

KARANG TEGAL LAN CARIK

Pawos 27

- (1). Karang suang-suang krama désa, watesé sisih kalér muwah kangin patut kakaryanin antuk sang madrué karang, réh punika mawasta gegaleng kaluan.
- (2). Tegal miwah carik, sang madrué patut mamiara batas sisih kelod miwah kauh, punika mawasta gegaleng katebén.
- (3). Pradé karasayang batesé nglikadin, yén pada arsa panyandingé kéngin nganggén pal saking Badan Pertanahan Nasional (BPN).
- (4). Pradé wénten karang kabebeng mangda kautsahayang wénten pamargi / uwak-uwakania.

- (1). Sinalih tunggil krama désa / banjar tan kalugra :
 1. Nglahlah margi, karang lan carik.
 2. Nglahlah tanah tegak sinanggeh suci, makadi kahyangan utawi sétra.
- (2). Pradé wénten sakadi ring ajeng, sang nglahlah patut ngwaliang tanah sané kalahlah saha pamidanda manut pararem, kadulurin upakara pacaruan ring tanah tegak suci inucap.

Kaping 2

PEPAYONAN

Pawos 29

- (1). Ngawit nandur pepayonan tanem tumuwuh, patut adepa agung ngajeroang saking, bates, pradé jantos ngliwat bates wenang kasepat gantungin.
- (2). Pradé wénten tetanduran ngungkulin napi malih mawastu mayanin kapisaga, patut kawara antuk paiguman sané becik, prasida sang nruénang wit ngrebah / notor.
- (3). Pradé sampun kawara sakadi ring ajeng taler tan wénten usaha sang nruénang wit, kéngin sang rumasa kajerihan / katetehan nyadokang ring prajuru désa / banjar.
- (4). Prajuru maritatas muah nibakang pamutus :
 1. Ngrebah wit sané mayanin antuk panaur prabéa pati ring sang nruénang wit anut lokika.
 2. Pradé jantos ngrubuhin, risampun pecak polih kawara, patut keni pamidanda panyangaskara muah prabéa manut pararem sang nruénang wit inucap, utawi sang munggul notor wiyadin ngrebah taler ngrubuhin wewangunan jadma tios.

Kaping 3

WEWANGUNAN

Pawos 30

- (1). Nyabran ngwangun patut :
 1. Masadok ring prajuru pradé wewangunan inucap ngeninin bates.

2. Nganggé gegulak : asta kosala-kosali muah asta bumi, sané mané manut ring petitis niskala.
 3. Tan nyayubin kapisaga.
- (2). Pradé wewangunan jantos nyayubin, bilih-bilih témboké ring telenging bates risampun kawara, tur kasadokang ring prajuru saha kaparitatas, wenang keni pamidanda manut pararem, saha témbok inucap kéngin kagubar utawi sanistané mangda kakaryanang abangan, sapatutnia sadéréng némbok kawéntenang paigum riyin sareng panyandingé.

Kaping 4

WEWALUNGAN

Pawos 31

- (1). Sahanan warga désa sané mamiara sakaluring wewalungan, patut sayaga niténin negul, nglogor, mangda tan ngrusak karang utawi pabianan krama sios, bilih-bilih jantos ngranjing ngletehin Kahyangan Désa.
- (2). Pradé wénten wewalungan malumbar utawi ngeléb jantos ngrusak pakarangan / pabianan, risampun kawara kéngin kataban tur kadanda manut pararem saha ngwaliang wit, tur nawur panebas panabañan manut lokika prajuru.
- (3). Pradé jantos ngletehin tegak suci, risampun kaparitatas antuk prajuru, wenang sang nruénang kadanda manut pararem saha upakara sesayut durmengala.

Kaping 5

BHAYA

Pawos 32

- (1). Indik bhaya kaucap panca bhaya, luiripun.
 1. Jiwa bhaya, makadi kepét patinia, kabaak / karampok, kakaninin, lan siosan punika.
 2. Arta bhaya utawi kapandangan / kamalingan.
 3. Geni bhaya utawi katunuan, umpami umah puun.

4. Ér bhaya utawi kablabaran, anyudang embah.
 5. Dura cara ring agania.
- (2). Sang manggihin kahanan jiwa bhaya patut nepak kulkul mapitulung manut pawos 23 angka (5), tur sang mayanin keni prabéa patibajampi saha panyangaskara pangulapan.
 - (3). Pradé kacunduk arta bhaya patut ngulkul anut pawos 23 angka (3), utawi sang kamalingan atur supéksa ring prajuru sané pacang nimbangin saha niwakang pamutus ring dustané.
 1. Sajawaning nunasang ring Polisi, taler ngeninin pamidanda mangda atur ring undang-undang panegarané (K.U.H.P) saha ngwaliang wit.
 2. Pamidanda nikel pradé teher mamaling lintangan ring apisan.
 3. Kawewehin panyangaskara pradé ngamaling barang sinanggeh suci.
 - (4). Pradé wénten manggihin katunuan utawi kablabaran / anyudang embah patut ngulkul manut pawos ring ajeng, katedunin antuk sahanan ayahan saha gegawañ manut rupan bhayané.
 - (5). Pradé wénten sinalih tunggil krama katunuan patut krama matulung ngaryanang kubu tetanceban.
 - (6). Sang dura cara ring agama pradé macihna manut tri pramana, wenang jadma punika kadanda manut pararem saha panyangaskara.

Kaping 6

PANYANGGRAN BANJAR

Pawos 33

Krama Désa / Banjar ngwéntenang karya suka-duka, polih panyanggran (karombo) antuk banjar utawi pangampok ring suang-suang ubanjaran sakadi ring sor :

1. Rikala ngwangun pitra yajnya utawi manusa yajnya, manut pinunas sang mayajnya.
2. Banjar pangampok rikala mapitulung ring sang kaduhkitan ngwangun pitra yajnya nista, tan polih pasangu.
3. Pangingu pangrombo yan sangkaning pinunas sang mayajnya, ping pisan jantos puput yajnyania.

SUKERTA TATA AGAMA

Palet I

INDIK DÉWA YAJNYA

Pawos 34

(1). Luir kahyangan ring Désa Adat Kuta :

1. Kahyangan Tiga, Puseh, Dalem (Dalem Kahyangan) lan Désa / Balé Agung.
2. Pura Dalem Panataran, Pura Mrajapati.
3. Pura Panyarikan.
4. Pura ring suang-suang ubanjaran maka stan an Ida Bhagawan Panyarikan.
5. Pura Padarman, Panti, Paibon, nistania Kemulan Taksu sané wénten ring wewengkon Désa Adat Kuta kabawos prasanak désa.

(2). Piodalan ring Kahyangan Désa :

1. Pura Puseh rikala Sukra Paing wuku Dungulan.
2. Pura Désa lan Balé Agung rikala Soma Kliwon wuku Kuningan.
3. Pura Panyarikan rikala Buda Wagé wuku Langkir.
4. Pura Dalem Kahyangan / Panataran lan Mrajapati Buda Umanis wuku Medangsia.
5. Pura suang-suang ubanjaran manut banjarania suang-suang.
6. Pura Prasanak Désa manut ring pamaksan prasanak suang-suang.

(3). Pangaci sané kalaksanayang nista, madia manut kecaping sastra agama kadulurin antuk pararem dané Mangku Désa.

(4). Pangempon Pura Kahyangan Tiga, Panataran lan Panyarikan kaempon suang-suang banjar manut pararem.

1. Pura Désa lan Balé Agung kaempon antuk Banjar Temacun, Banjar Pemamoran, Banjar Pering lan Banjar Tebasari.
2. Pura Puseh kaempon antuk Banjar Pelasa lan Banjar Anyar.
3. Pura Dalem Kahyangan kaempon antuk Banjar Pandé Mas lan Banjar Pengabetan.
4. Pura Panataran, kaempon antuk Banjar Jaba Jero lan Banjar Segara.

5. Pura Panyarikan, kaempon antuk Banjar Tegal lan Banjar Buni.
6. Pura Banjar kaempon antuk ubanjarania suang-suang.
7. Pura Prasanak, kaempon antuk pamaksan / pakulawargania suang-suang.

Pawos 35

- (1). Ring suang-suang pura inucap ping ajeng kawéntenang pamangku.
 1. Ring pura sané kaempon antuk désa adat, makadi Kahyangan Tiga kaadegang Mangku Ageng miwah Mangku Alit maka panampa panugrahan Mangku Ageng.
 2. Sajawaning punika kabawos Mangku Prasanak.
- (2). Ngadegang pamangku patut majalaran antuk :
 1. Nyanja ring natar pura.
 2. Ngwilang saking turunan utawi ngwaris.
 3. Pradé makakalih ring ajeng tan wénten wawu pilihan saking krama désa.
- (3). Tan kawenang anggén pamangku, luihipun :
 1. Céda angga.
 2. Sapa sira ugi tan kasungkemin antuk krama désa.
 3. Tan pasastra.
- (4). Prabéa kapamangkuan :
 1. Adiksa widhi (ngwintenang) kamedalang saha kamargiang antuk sang ngadegang makadi krama désa utawi pangempon pura suang-suang.
 2. Pamangku sané adiksa widhi tan wenang kapendem, patut kaabéang.
 3. Pamitra yajnyania riwekas taler patut kasungkemin antuk sang ngadegang.

Pawos 36

Swadharmaning pamangku, luihipun :

- (1). Ngénterang upacara piodalan ring Kahyangan Désa, utawi ring suang-suang pakubon krama désa muah ngaturang panawuran / paneduh suang-suang krama désa.

- (2). Sang mapanauran patut masadok ring prajuru mangda kailikitayang tur kaunggahang druén désa, luiré :
1. Panauran upakara, upacara lan wewalén.
 2. Panauran lelues lan mulé-mulé.
 3. Sesari-sesari langkungang ring 500 wijinah bolong, patut kacatet antuk Pamangku.
- (3). Pamangku Kahyangan Désa kawenangang :
1. Nibakang panugrahan ring mangku sanak lan krama désa manut pararem.
 2. Polih panampa rikala ngamargiang pujawali, saking Mangku Kahyangan Désa siosan, wargan dané mangku muah mangku sanak.
 3. Pradé wénten jadmá nalih pamangku malaksana iwang, yan pradé tan mabukti, sang niwakin patut nyepuh dané mangku, sakéwanten pradé kaiwangannya mabukti manut tri pramana, patut pamangku punika nyepuh raga antuk upacara panyepuhan.
 4. Pradé pamangku polih empeh utawi pawuwus, wenang kasadokang ring Prajuru.

Pawos 37

- (1). Rikala upacara piodalan sampun ngalang sasih (galah dadi) wénten salah sinunggil Mangku cuntaka sangkaning lampus, upacara kamargiang antuk Mangku Kahyangan siosan sané tan kapiambeng, pradé sinamian kapiambeng patut nuwur sang Sulinggih muputang yajnyania.
- (2). Pamucuk karya ring Kahyangan Désa kaampok antuk krama banjar manut dresta.
- (3). Krama Banjar siosan ring pangampok wenang ngaryanin gebogan asiki kairing antuk krama suka-duka ring ubanjarania ngaturang bakti ka pura, saha suang-suang krama Banjar inucap tragia makta kawangén miwah sekar kaanggén muspa, saha tan kalugrayang ngwéntenang ilén-ilén ring sawidangan Désa Adat Kuta sané matetujon ngrereh artha brana.

Pawos 38

Petias utawi pikolih Pamangku, luiré :

1. Apahtigaan sesari ring désa.
2. Pamupon bukti dinaksinan nyabran sasih, manut pararem désa.

3. Leluputan, luput manut pawos 9.
4. Petias siosan manut pararem désa.

Pawos 39

- (1). Pamangku kagentosin riantukan lampus utawi sangkaning kagentosin / kararianang menawi pinunas ngraga riantukan malaksana asta dusta.
- (2). Pradé pamangku kararianang sangkaning mabukti malaksana asta dusta, kadanda manut pararem désa saha ngwaliang panelas pawintenané pecak.

Pawos 40

- (1). Pamangku tan kawenangang, luiré :
 1. Makarya sané kabawos cerobo / leteh.
 2. Mamunyah.
 3. Mamadat.
 4. Mamitra ngalang.
 5. Mamandung utawi mamaling.
 6. Ngalap rabi malih.
 7. Masumpah (anayub cor).

KASUKERTAN KAHYANGAN DÉSA.

Pawos 41

- (1). Tan kalugra ngranjing ka Pura, luiré :
 1. Sang cuntaka sangkaning sebel raga utawi kalampusan manut sengker.
 2. Makta sahanan barang sinanggeh nglethin.
 3. Sato agung sajawananing ritatkala mapepada.
 4. Mabusana tan manut kadi tata caraning ngranjing ka pura.
 5. Sadéréng polih uwak-uwakan / pituduh saking prajuru.

- (2). Pratingkahé tan wenang ring pura, luiré :
 1. Masumpah (anayub cor).
 2. Makobetan / makolem lanang istri dados asiki utawi masesenengan.
 3. Mabacin, mawarih utawi menahin wastra / pusungan, lan siosan punika.
- (3). Pradé wénten jadma karauhan ring pura kéngin kapintonin pradé karauhannyané rumasa kasumbangsayain, yan wiakti, jadma punika kadanda manut pararem, asapunika taler pamidanda mamurug angka (1) miwah angka (2) ring ajeng.
- (4). Pradé Kahyangan Désa kahanan durmangala, sakadi kapanca bhaya, kahanan wangkén sato agung, karubuhan, lan siosan punika, Pamangku patut pramangkin nyadókang ring prajuru mangda nyamuang krama désa tur ngwéntenang upakara-upakara sapatutnia.

Palet 2

INDIK RESI YAJNYA

Pawos 42

- (1). Sang pacang mapudgala (dwi jati) sajawaning nunas panugrahan sang rumawos (Parisada muah Kantor Agama) taler patut masadok ring Prajuru Désa.
- (2). Prajuru inucap patut sareng nuréksa niténin mangda sulur kalih pamarginé jati-jati manut kecaping agama, sakadi kacéda anggan lan siosan punika, saha sareng nyaksinin pamargin upacara.
- (3). Prajuru Désa patut digelis ngentosin parab sang diniksan ring sahanan ilikita antuk biséka kawikon manut panugrahan nabénia, saha kasiarang ring pasamuhan désa utawi banjar.

Pawos 43

- (1). Sajawaning Pamangku, sang pacang mawinten maka buatan pacang mamargi nyonténg, dalang, sakaluiré jagi ngénterang yajnya, patut masadok ring prajuru désa / banjar.
- (2). Prajuru patut ngawas niténin muah wenang ngalangin pradé kacihnan sasar kekecap muah dresta tur sareng nyaksinin upacara upakara saha salanturnia nyiarang (nyarwakang) ring pasamuhan désa / banjar tegap rawuhing wates kawenangan pangénter yajnyané.

- (1). Krama désa / banjar katuntun antuk prajuru patut sareng ngawas niténin mangda sahanan yajnya sané kawéntenang kaicén pamuput olihi Pandita utawi Pinandita (Pamangku, Dalang lan sakaluiré) manut kawenangania suang-suang.
- (2). Prajuru patut nuntun saha ngamanggala krama désa mikukuhin linggih para wiku muah pinanditané ring wewidangan Désa Adat Kuta.
- (3). Ngaturang dana punia ring ida sang muput yajnya, manut nista, madya, utamanin yajnyania.
- (4). Nelebang, mapiresep pawisik lan pustaka suci pakaryan ida para resi.

Palet 3

INDIK PITRA YAJNYA

Pawos 45

- (1). Pangupakara sang lampus, luiripun :
 1. Wenang mendem utawi ngeseng kadulurin upakara antuk tirta pangentas, tur maduluran antuk upacara ngrorasin (makelud).
 2. Atiwa-tiwa utawi upakara pangabénan, tur sané patut kéngin kaabén risampun ketus untu, pradé durung ngawit saking yusa tigang sasih (asambutan) patut kaupakara ngabénang nglungah.
- (2). Upakara-upakara pitra yajnya riwusan kaabénang, patut ngrorasin, wawu kamargiang upacara munggah daun bingin utawi nyekah, raris kamargiang upacara nglinggihang Déwa Hyang Pitara-Pitari.

Pawos 46

Swadarma lan tetegenan pradé wénten krama lampus.

- (1). Sang kaduhkitan patut :
 1. Nyadokang ring kelihan suka-duka tur nunasang tetimbangan ring kawéntenania.
 2. Ngaturin krama banjar ngrombo makarya étéh-étéh sawa.

(2). Swadarmaning désa / banjar :

1. Prajuru maritatas lan mamutus pamargin sang kaduhkitan, manut dresta napi pacang kapendem utawi lantur kaabénang.
2. Nepak kulkul anut pawos 23 angka (4) ring ajeng.

(3). Panyanggran banjar salanturnia :

1. Suang-suang krama nedunin patus manut pararem suang-suang ubanjaran, asampunika taler pradé lantur kaabénang.
2. Krama banjar lanang istri ngambil karya manut dresta saha ngrombo rikala pakutangan, kapatut mabusana adat sanistania nylémpot / masesenteng.
3. Pamargin sawa muah upakarané mangda mamargi dabdab tur antar.

(3). Tan kéngin nglelet langkungan ring awuku (pitung rahina) tur polih pagebagan anut paétangan kelihan suka-duka, pradé wénten mamurug wenang kadanda antuk upacara banten pamrayascita ring Kahyangan Tiga Désa.

Pawos 47

Pamendeman patut kalaksanayang kadi ring sor :

(1). Nganutin déwasa, saha tan kalugra mendem.

1. Rikala Purnama / Tilem, Kajeng Kliwon, Buda Kliwon, Saniscara Kliwon, Saniscara Watugunung, Candung Watangan.
2. Makirim wangké, makajang wangké lan nglangkar watangan.
3. Rikala piodalan lan pauman ring Kahyangan Désa, utawi panyejeran Ida Bhatara rikalaning malasti.

(2). Nganutin genah, inggih punika :

1. Ring sétra raré, genah pamendeman wong raré sané durung ketus untu.
2. Sajawaning punika kapendem ring genah sétra ageng.

(3). Kalugrayang mendem manut paétangan :

1. Anak alit sané durung tumbuh untu patut kapendem pramangkin tan nyantos déwasa malih.
2. Pamendeman rikala piodalan sané kabawos galah dadi, patut ngamandung tan masuara gendongan banjar, mamargi galah wengi lan masuar, saha tan maupakara pramangkin taler tan karombo antuk krama banjar.

- (4). Ring sétra tan kalugrayang makarya undung-undung (kuburan) sakéwanten kéngin mapinget asiku bah-bangun pracilina panamaya miwah parab sang lampus.
- (5). Pradé wénten krama tios désa mendem, kakeninin panukun sétra gung arta wijinah jinah bolong saha upakara sajangkepnia manut pararem.

Pawos 48

- (1). Pradé lampus sangkaning salah pati, ulah pati lan kabengawan, sawané kalugra kabakta budal tur kapratéka sapatutnia, risampun kamanggala antuk banten panebusan lan banten pangulapan.
- (2). Pradé wénten sinalih tunggil krama ngerobang warga keni gering tan wenang tambanin / gering agung, lan siosan punika, sadéréng lampus patut digelis kasadokang ring prajuru miwah kapatiba-jampiang usada dokter, pradé mamurug sang ngerobang kadanda manut pararem saha rikapatian wong gering inucap tan polih pangromboan miwah suaran kulkul.
- (3). Pradé wénten anak istri lampus ngadut manik tan wenang pendem sadéréng bobotané embas.

Pawos 49

- (1). Mungguing kacuntakan kadi ring sor :

1. Saking ubanjaran salamin ipun tigang rahina.

- Pradé kapendem / ngabén pramangké, ngawit saking lampus ngantos tigang rahina saking pangutangan (palebar buntas).
- Pradé atiwa-tiwa nyekah (ngerit), ngawit saking ngulapin ngantos tigang rahina saking pangutangan (palebar buntas).

2. Sang madrué layon :

- Durung kepus udel cuntaka abulan pitung rahina.
- Risampun kepus udel ngunggahang, masué roras rahina.
- Saking sulur kilitan pakulawargan, tunggal pamrajan ageng, lan siosan punika, masué roras rahina.

(2). Tan kenéng cuntaka, luiripun :

1. Sang sulinggih lan Pamangku Kahyangan Désa.
2. Rikala ngwangun yajnya ring Kahyangan Désa risampun galah dadi.

Pawos 50

- (1). Atiwa-tiwa (pangabénan) wénten kalih soroh pamarginia.
 1. Nyawa resi utawi nywasta geni.
 2. Sawa pratéka.
- (2). Nyawa resi kamargiang antuk pangawak dwaning tan ngagah, menawi galihé tan kakeniang.
- (3). Sawa pratéka kamargiang antuk ngagah galih, utawi mratéka sawa bah-bangun.
- (4). Dudonan pangabénané kadi ring-sor :
 1. Ngaskara antuk ngagah galih utawi nyawa resi.
 2. Pangutangan antuk ngeseng sawa.
 3. Pakiriman.
 4. Ngrorasin.

Pawos 51

- (1). Panemayan pangabénan nyekaa utawi ngerit olih Désa Adat Kuta, kamargiang sanistané nglimang warsa, manut pararem.
- (2). Tata sulur pangabenan manut ring ajeng, maweweh malih kadi pararem Pamangku Kahyangan Désa.
 - Béa panukun sétra katur ka Dalem Kahyangan, manut dresta lan pararem.
 - Numbas tirta ring Kahyangan Tiga, manut pararem.

Palet 4

INDIK MANUSA YAJNYA

Pawos 52

- (1). Manusa yajnya inggih punika upacara-upakara dharmaning manusa, ngawit saking patemoning kama petak lan kama bang sajeroning garba (waduk) ibiang ngantos lampus riwekas.

(2). Upakara-upakara ring ajeng, madudonan sakadi ring sor :

1. Magedong-gedongan duk pangrempinian ibiang.
2. Duk sang kama réka / raré wawu embas.
3. Kepus udel.
4. Raré mayusa roras rahina.
5. Akambuhan, yusa raré اساس pitung rahina.
6. Tigang sasih (asambutan).
7. Pawetonan / odalan risampun tutug nem sasih.
8. Tutug kelih, ngraja wadoné lan ngembakin lanangé.
9. Mapandés / matatah lan wiwaha.
10. Mawinten / éka jati.
11. Lan siosan punika.

(3). Upakara-upacara inucap nista, madia, utama, nganutin sastra agama miwah dresta ngawinang sima cara Désa Adat Kuta.

(4). Upacara pawintenan anut sakadi pawos 43, pradé pacang ngénterang yajnya utawi manut dresta pradé pawintenan ngraga, muah upacara pawiwahan anut pawos 57 rancan 1 ring sor.

Palet 5

INDIK BHUTA YAJNYA

Pawos 53

(1). Bhuta yajnya inggih punika upacara-upakara pabéakalan ring pretiwi lan kahyangan miwah sarwa prani saha bebhutan.

(2). Upacara pabéakalan ring sarwa prani, luihipun :

1. Ring sarwa tumuwuh, rikala Tumpek Wariga.
2. Ring sarwa ingon-ingon, rikala Tumpek Uyé.
3. Upacara pakala-kalan manusa manut wiguna, ketah kabawos pabéakalan.

- (3). Upacara-upakara pabéakala ring pretiwi muah kahyangan lan ring bebhutan, kabawos macaru, sané kamargiang nista, madia, utama, manut wiguna, luihipun :
1. Caru Ékasata.
 2. Caru Pancasata.
 3. Caru Resigana.
 4. Caru Pancakelud.
 5. Caru Pancasanak agung.
 6. Caru Kasanga.
 7. Nangluk Mrana.
 8. Ngusaba.
- (4). Sajawaning ring ajeng kawéntenang yajnya sésa (masaiban / majotan) nyabran wusan maratengan.

Pawos 54

Upacara tawur Kasanga rikalaning Tilem Kasanga.

- (1). Majeng ring Ida Bhatara Kahyangan Désa :
1. Pangelong ping 13 malasti ka segara, kairing antuk para sanak ring sawidangan Désa Adat Kuta.
 2. Upakara ring segara kaétang antuk prajuru désa / banjar sané kaampok antuk banjar manut dresta.
 3. Ring pangelong ping 14 nyejerang Ida Bhatara ring Pura Désa / Balé Agung.
- (2). Upacara tawur manut sakadi ring sor :
1. Pacaruan kawéntenang manut genah.
 2. Nyoréang kawéntenang pangrupukan.
 3. Tan kalugra malih malila-lilayan antuk geni muah ngrupuk jantos langkung tengah wengi, réh rahina inucap sampun nampih rahina sipeng bénjangané.

Pawos 55

- (1). Upacara rahina Nyepi / Sipeng patut kamargiang catur pabratan kadi ring sor :
1. Amati geni, sajawaning :
 - Madué raré durung mayusa tigang sasih ring genah raré inucap.
 - Matepetin, ring genah sang sungkan.
 - Madruwé layon ring genah sawa inucap.

2. Amati karya tan kénjin anyambut gawé, sajawaning Pecalang Désa lan Prajuru Dinas miwah sang polih uwak-uwakan (ijin) antuk ilikita pastika saking sang Mawangrat.
 3. Amati lampah, tan kénjin malelungayan.
 4. Amati lelanguan, tan kénjin masuara gora, maoneng-onengan (maplalian) lan siosan punika.
- (2). Pradé wénten krama mamutug brata panyepian, kadanda manut pararem, sané kamargiang antuk Pecalang Désa lan Petugas Dinas.
- (3). Riwusan rahina Nyepi kawastanin Ngembak Geni, mapiteges panglukaran yoga semadi kadulurin antuk pangaksama, suang-suang krama désa / banjar ring Désa Adat Kuta, maka cihna pangawit Isaka Warsa.

SARGA V

SUKERTA TATA PAWONGAN

Palet I

INDIK PAWIWAHAN

Pawos 56

- (1). Pawiwahan inggih punika patemoning purusa lan pradana malarapan panunggalan kayun sukacita kadulurin upasaksi sekala lawan niskala.
- (2). Palaksanaan pawiwahan ring Désa Adat Kuta, luiripun :
 1. Pepadikan kamanggala antuk pawirasan.
 2. Marangkat mamargi riin wawu mawirasa (malaku).
 3. Nyeburin utawi sentana nyeburin (sané purusa manggeh pradana).
- (3). Pidabdab sang pacang mawiwaha, patut :
 1. Sampun manggeh daha teruna.
 2. Sangkaning pada rena utawi tan pepaksan.
 3. Manut kecaping agama utawi tan gamia gemana.
 4. Kamanggala antuk banten sudhiwadani pradé pangambilé tios agama.

- (4). Pamargin parabian inucap ring ajeng taler nganutin uger-uger pawiwahan Negarané (Undang-Undang Perkawinan).
- (5). Pradé sinalih tunggil kecapé ring ajeng kapurug, panganténé kéngin kapalasang tur kadanda manut pararem.

Pawos 57

- (1). Pawiwahan sané kapatutang ring Désa Adat Kuta, manut pawos 56 (1) risampun :
 1. Mawidi widana sanistané pabéakalan.
 2. Kasaksinin antuk Prajuru Désa / Banjar Adat lan Dinas.
 3. Kaungguhang sajeroning pailikitan tur katumusang ring sang ngawawenang.
 4. Naur prabéa upasaksi pawiwahan masarana banten daksina masesari 225 jinah bolong.
- (2). Parabian kabawos tan patut, pradé :
 1. Natab upakara saking pepaksan.
 2. Sinalih tunggil tan rawuh.
 3. Nénten wénten saksi muah ilikita.

Pawos 58

Tata caraning parabian patut sakadi ring sor :

- (1). Sapa sira ugi ngwarangang pakulawargané patut masadok ring Prajuru Désa / Banjar, salantur ipun kaparitatas manut tan manut kecap parabiané.
- (2). Pradé mamadik pamarginé manut dudonan :
 1. Pawirasan patut ping tiga saha suang-suang malarapan :
 - Kapertama antuk ngidih utawi masuaka.
 - Pangambilan.
 - Majauman.

2. Risampun puput bebawosan sang wadon kaajak budal ring pakubon sang lanang, saha kalanturang antuk upakara pabéakalan.
3. Mangda tumus, patut kapikuren sekala niskala, patut kamargiang upakara nelok antuk kulawarga purusa maduluran pajati kahatur ring mrajan wadoné.

(3). Pradé marangkat (ngrorod) patut :

1. Reraman lanangé ngwéntenang pamilaku / pajati antuk duta sakirangnia kalih diri, saha tan kénjin kasépan ring arahina maka sarana damar.
2. Genah anténé wenang magingsir saking pakubon sang sané ngambil.
3. Mawaneng tigang rahina risampun panglukuan patut mapajati.
4. Sasampuné pajati katrima, raris kalanturang antuk pawirasan kadi ring sor :
 - Kamanggala antuk geng pangampura arep ring reraman wadoné.
 - Kaigumang bawos idih pakidih utawi palegayan arep ring pasuwakan sang ngluku saha déwasa pakerab kambéané riwekas.
 - Kacihnayang indik kapurusan utawi pradé sentana rajeg kajejerang, patut ngidih anak lanang sané kabawos pawiwahan nyeburin, tur risampun sulur pamerasan kategepin kamanggehang sentana nyeburin.

(4). Pradé pajati tan katrima jantos ping tiga, pawiwahané tetep kamargiang.

(5). Teges pakerab kambéan upacara tinas apadang mapikuren, duaning :

1. Sajeroning kabawos ambé, kamargiang ring sekala antuk sarana jejauman, ketah kabawos ring Désa Adat Kuta "nelok".
2. Bawos kerab, palaksana wantah ring sekala antuk panyaksi krama banjar / désa, pamekas saksi prajuru tur ngilikitayang ring genah kapurusan.

Pawos 59

- (1). Piteges pawiwahané patut sang lanang marabi adiri, taler sawaliknia sajawaning wénten pasubaya tios.

- (2). Pradé wénten lokika sanggraha jantos mobotang kapatut :
1. Sang mobotang patut nyakapang sang wadon, pradé tan tinut nyakapang kadanda manut pararem saha panyangaskara pamrayascita ring Pura Désa, kadulurin ngupakara bobotania jantos ngupajiwain sang raré riwekas.
 2. Pradé tan wénten sané ngangken malaksana mobotang, patut kulawargan wadoné ngrebu ring Pura Désa tur ngupakara sang mobot, mawastu raré sané embas tan kabawos panak bebinjat.
- (3). Pradé wénten ngeker anak istri, mamitra ngalang, lan siosan punika, mawastu jatma inucap kabawos mekélín Banjar, patut jatma inucap mawiwaha, yan tan manut keni panyapsap semara dudu geng arta, siu (1000) wijinah bolong saha wusan malaksana kadi ring ajeng. Pradé mamurug keni pamidanda nikel, taler tan manut nawur, kulawargan jatma inucap tan polih suaran kulkul asing-asing makarya suka-duka. Pamidanda ping unkur taler kapurug mawanéng kalih pasangkepan, wenang jatma inucap kawusang makrama banjar utawi désa. Asapunika taler dudonan pamidanda angka (2) ring, ajeng miwah angka (4) ring sor.
- (4). Pradé wénten drati krama utawi paradara, lan siosan punika, sané ngawinang cemer pajagatan Désa Adat Kuta kakeninin pamidanda manut angka (3) ring ajeng.

Palet 2

INDIK NYAPIAN

Pawos 60

- (1). Pawiwahan prasida kawusang malarapan antuk palas parabian utawi kapademan.
- (2). Wusan mapikuren saantukan salah sinunggil lampus mapiteges balu.
- (3). Palas parabian wénten sangkaning lila utawi mawiwit wicara, pracihna tan tumus suka citaning panunggalan idep sang alaki rabi, kabawos nyapian.
- (4). Sang ayat palas marabian patut atur supéksa pailikitan ring sang rumawos (Pengadilan Negeri) wastu tinas apadang pamutusé, kabawos nyapian, nglantur prajuru nyiarang kawéntenania ring wewidangam banjar / désa saha pamidanda masamsam ring Balé Agung.

Tata caraning palas marabian :

- (1). Sulus palas parabian, pradé sinalih tunggil, anyasar laku, céda angka, wirasaning laku, matilar tan pasadok, lan siosan punika, muah setata wak parusia tan prasida adung malih.
- (2). Pradé wicara katumusang antuk lanangé, makacihna :
 1. Istriné paradara (anyasar laku).
 2. Amandel sanggama (maambul-ambulan jantos nem sasih).
 3. Cédangga tan prasida nyanggamén.
- (3). Pradé wicara katumusang antuk istriné, makacihna :
 1. Lanangé dratikrama (mamitra).
 2. Tan ngupajiwén jantos nem sasih.
 3. Wandu (cédangga).
- (4). Pradé manut tri premana sang mawicara inucap angka (2) miwah angka (3) :
 1. Parabian kéngin kapalasang.
 2. Katiwakin pamidanda anut pawos 60 angka (4).
- (5). Pradé palas parabian sangkaning pada lila patut :
 1. Nawur prabéa anut pawos 60 angka (4) sami pada atenga.
 2. Pagunakayan polih pahan pada.
 3. Pabekel / tadtadan kakuasa niri-niri sakéwanten warisan kakuasa antuk purusa.
 4. Ngweruhin muah ngupajiwén pratisentana manut swadarmaning guru rupaka.
- (6). Pamidanda panyapihan inucap ring ajeng, kéngin kamargiang risampun katiwakin pamutus antuk sang rumawos anut pawos 60 angka (4).

Pawos 62

- (1). Pradé riwekas sang palas kacihnayan adung malih, patut :
 1. Nglaksanayang piwihahan malih anut pawos 57 angka (1).
 2. Keni pamidanda nikel saking palasé, yadiastun wit palasé pecak sangkaning pada lila.

(1). Suang-suang balu kabinayang dados :

1. Balu luh wit sentana (sentana rajeg) muah balu luh boya sentana.
2. Balu muani kapurusan muah balu muani nyeburin.

(2). Swadarmaning balu inucap patut :

1. Ngamanggehang pati brata, tan kénigin ngamargiang paradara, dratikrama.
2. Ngwasayang warisan, pagunakayan rabinnia pecak, tan kénigin ngaddi, makidihang, lan siosan punika, sajawaning polih kabebasan saking pianak utawi pakulawargan pinih tampek saking rabiné.
3. Kénigin ngidih sentana, pradé sampun wénten pidabdab sadurung sinalih tunggil lampus, saha kabébasang antuk kulawarga sinanggeh kapurusan.
4. Kawenangang mawiwaha malih pradé sampun polih paigumari saking ola deha teruna utawi kulawarga kapurusan tur prasidha ngupajiwén santanania.

Pawos 64

(1). Balu kaucap tan pageh, luiripun :

1. Dratikrama / paradara,
2. Matilar saking pakubon tanpa sadok masué jantos nem sasih, lémpas ring swadarmaning balu, tan prasidha ngeséhin solah maprawerti arep ring pituduh kulawarga kapurusan.

(2). Pradé macihna manut tripramana, balu luh utawi balu muani sané boya santana wenang :

1. Katundung antuk pianak utawi kulawarga kapurusan.
2. Tan polih upon waris.

(3). Pradé balu inucap pageh katundung antuk kulawarga kapurusan kénigin polih pedum paguna kayania.

INDIK SENTANA

Pawos 65

- (1). Sentana wénten kalih pawos, sané kaucap pratisentana muah sentana peperasan.
- (2). Pratisentana, inggih punika sentana sané medal saking pawiwahan.
- (3). Pradé parabian tan patut, ngwéntenang sentana, mangda tan kabawos astra / panak bebinjat patut kamanggala antuk upakara sesayut panyampi.
- (4). Pradé pawiwahan tan ngwetuang sentana kéngin ngedih sentana antuk upasaksi sekala lan niskala, sané kabawos sentana peperasan.

Pawos 66

- (1). Ngangkat sentana manut dudonan patut makacihna widhi widana pamerasan saha kasinaksiang sekala lan niskala.
- (2). Sapa sira ugi pacang ngidih sentana patut masadok ring Prajuru Banjar / Désa sakirangnia asasih sadurung panamaya pamerasan.
- (3). Désa Adat Kuta kawakilin antuk Kelihan-kelihan Suka Duka patut nyarwakang ring sawidangan désané. Sang sapisira rumasa tan lila mangda nyadokang masengker kalih wuku sabanén pamerasan ring Kelihan Désa Adat Kuta.
- (4). Kelihan Désa Adat Kuta digelis mawosin saha ngicénin pamutus anut ring catur dresta muah pararem Désa Adat Kuta.
- (5). Pradé sulur pamerasan tan manut ring kecapé ring ajeng, prajuru wenang ngandeg sang pacang makarya, saha ngicénin panuntun mangda kapuputang riin bebawosané sulur muah wicarania.

Pawos 67

- (1). Peperasan sané kapatut ring Désa Adat Kuta risampun makacihna :
 1. Widhi widana pamerasan.
 2. Kasaksinin antuk Prajuru Adat lan Dinas saha kajarwakang ring désa / banjar.
 3. Wénten ilikita ungguhan tata sulur pamargin pamerasané.

(2). Sané kapatut anggén sentana :

1. Jatma magama Hindu.
2. Pepernahan nedunang saking sang meras.
3. Kulawarga saking purusa, pradé tan wénten kéngin saking wadon, bilih taler tan wénten wawu kéngin sakita kayun (sakama-kama).

(3). Kéngin ngangkat sentana langkungan ring adiri, lanang wiadin wadon.

Pawos 68.

Swadarman guru rupaka patut ngupajiwén saha ngweruhin pratisentana :

- (1). Pangupajiwa anut petitis grehasta ngamanggehang karahajengan pratisentana, antuk pawéwéh upaboga (sandang pangan) muah patibajampi nyabran kageringan.
- (2). Pangweruhin anut petitis brahmacari, ngamanggehang kaprajnyanan sanistané mangda lepas ring Sekolah Dasar.
- (3). Pradé angka (1), (2) kapurug wenang guru rupaka inucap kadanda manut pararem banjar, pradé tan kaanutin kadanda manut pararem Désa.

Palet 4

INDIK WARISAN

Pawos 69

- (1). Warisan inggih punika tetamian arta brana saha ayah-ayahan ngupadi sukerta sekala niskala saking kaluhurania arep ring turunania.
- (2). Kang sinanggeh warisan, luiripun :
 1. Dué tengah makadi kahyangan / mrajan, pusaka siwa krana, ayah-ayahan, lan siosan punika.
 2. Paguna kayan, tadtadan / jiwa dana.
 3. Hutang piutang.

(3). Wawu kénjin kabawos warisan pradé wénten :

1. Sang mapiturun (pawaris).
2. Turunania (ahli waris).
3. Arta brana muah tetegenan / ayah-ayahan.

Pawos 70

Mungguing waris sakadi ring sor.

(1). Kénjin manggeh ahli waris :

1. Pratisentana purusa, pratisentana pradana, sentana rajeg, sentana peperasan.
2. Pradé tan wénten sakadi ring ajeng, turunan purusa pernah ngunggahang, sakadi rerama misan mindon utawi turunan purusa pernah kasamping, sakadi kaponakan misan mindon.

(2). Swadarman ahli waris patut :

1. Nrima saha nguasayang tetamian pahan saking kaluhurania, sakadi ngrempon mrajan / pura saha pangupakarania, muwah nyledihin ayah-ayahan pawaris.
2. Ngabénang pawaris saha nglanturang upacara-upakara pitara.
3. Naurin hutang-hutang pawaris antuk tetamian pawaris.

Pawos 71

Pangepahan warisan manut sakadi ring sor :

- (1). Risampun kalaksanayang pitra yajnya lan hutang-hutang pawaris buntas kataur.
- (2). Pahan tetamian pada arep ring ahli waris, sajawaning wénten pasubaya pawaris sakantun maurip.
- (3). Sinalih tunggil ahli waris kénjin tan polih pahan pradé :
 1. Ninggal sesananing agama (kawitan).
 2. Alpaka guru rupaka.
 3. Sentana rajeg késah mawiwaha miwah pratisentana nyeburin suang-suang kabawos ninggal kadaton.

(4). Pradé boya ahli waris kéngin muponin kémanten manut dudonan :

1. Sentana luh salami dérèng késah mawiwaha utawi alpaka guru, pradé lokika sanggraha mawastu madrué pianak, sentanania inucap kéngin wantah ngwaris pagunakayan sentanania luh inucap makadi biyangé.
2. Mulih deha / teruna, riantukan ring pawiwahané pecak sampun kabawos ninggal kadaton.
3. Balu luh wiadin muani nyeburin (boya sentana).

(5). Pawaris kéngin mapawéwéh rikala maurip, pinaka :

1. Jiwa dana, tadtadan / bekel, makacihna pawéwéh tetep ring ipianak sané késah mawiwaha.
2. Pangupa jiwa, pawéwéh padgatakala pawaris maka pamupon hasil kémawon.
3. Pedum pamong / raksa, pahan waris padgatakala, ngantos pedum jumenek, saking pawaris arep ring ahli waris.

Pawos 72

(1). Pradé sajeroning pakulawarga wénten ahli waris langkungan ring adiri, patut :

1. Kawéntenang paiguman indik pedum waris inucap.
2. Yan tan prasida, katunasang tetimbangan ring Kerta Désa (Prajuru Désa Adat).
3. Pradé taler tan wénten cumpu ring panepas Kerta Désa, kéngin nunasang ring sang Rumawos (Pengadilan Negeri).

(2). Pradé wénten karang kaputungan, wenang prajuru mawosin / nuréksa sila-sila utawi sulur pakulawarga, tur nibakang ring :

1. Ahli waris saking purusa.
2. Pepernahan kasamping, yan tan wénten pepernahan ngunggahang.
3. Taler tan wénten angka 1 muwah angka 2, kéngin tiwakang ring wadon.
4. Pradé rawuh angka 3 ring ajeng tan wénten, wawu kéngin sakama-kama.

WICARA LAN PAMIDANDA

Palet I

INDIK WICARA

Pawos 73

- (1). Sané wenang mawosin makadi mutusang wicara ring désa, luiripun :
 1. Kelihan Suka Duka pradé sang mawicara patunggalan bebanjaran.
 2. Kelihan Désa Adat, pradé sang mawicara mabinayan bebanjaran.
- (2). Pradé sang mawicara tan wénten cumpu ring tata cara Kelihan Suka Duka mawosin, kéngin nunas bebandingan ring Kerta Désa (Prajuru Désa Adat).
- (3). Taler tan wénten cumpu ring panepas Kerta Désa, kéngin numusang wicara inucap ring sang Rumawós.

Pawos 74

- (1). Sajawanhing wicara sané mawiwit kacorahan sakaluiré miwah sinanggeh nungkasin daging awig-awig, pasuara lan pararem désa, patut pramangkin kabawosin tan nyantos pasadok.
- (2). Sajaba wicara kadi ring ajeng patut nyantos pasadok sang nunas bawos.
- (3). Panepasé patut pastika nyantenang iwang patut malarapan tri premana (saksi, ilikita, bukti) muwah tan maren nepék ring catur dresta.

PALET

INDIK PAMIDANDA

Pawos 75

- (1). Désa / Banjar wenang niwakang pamutus ring warga Désa / Banjar sané sisip.
- (2). Paniwak inucap kalaksanayang olih Kelihan Désa Adat utawi Kelihan Suka Duka nunggal-nunggal manut dudonan.
- (3). Agung alit pamidandané mesor singgih manut ring kasisipané, tan maren ngupadi darma kawelas arsan, pinih ajeng maka buatan ngwantunang kasudamalan Désa, makadinia bobotan pamidanda wijinah jinah bolong patut kaanutang ring pangargan jinah panegarané nyabran masa antuk pararem Désa.

(4). Bacakan pamidanda luiré :

1. Dedosan utawi dedandan arta miwah panikel-panikelnia:
2. Karandahin utawi karampag.
3. Pangampura utawi nyuwaka.
4. Tan polih suaran kulkul matchin pikenoh kapuikin.
5. Kararianang makrama banjar / désa.
6. Upakara panyangaskara.

Jinah utawi raja brana pamidanda ngranjing dados druén désa / banjar.

Pawos 76

- (1). Rikala pawanengan ngamedalang jinah pepeson / urunan, dedosan / dedandan, pradé celed utawi cedok risampuné kalugrahin témpo apasamuan kadanda nikel.
- (2). Risampun nikel mawaneng malih apasamuan taler tan nawur wenang karandahin, tur pikolih pangrandahé kagadéang masengker اساسih, pradé tan katebus anut sengker barang randahané kéngin kaadol samael-maelnia.
- (3). Tata cara ngrandahin (ngrampag) :
 1. Kalaksanayang antuk prajuru banjar kasarengin krama saakéhé tigang diri maka saksi.
 2. Sang ngrandahin sangkaning darsana ngambil barang utawi nyawénin tanem tuwuh, akéhnia manut hutang sang karandah.
 3. Prajuru miteketang mangda barang sané karahdah digelis katebus sadéréng rahina pacang kaadol.
- (4). Pradé pamargi karandahin taler tan kaanutin mawastu krama inucap sampun tan manut malih ring sadaging awig-awig, pasuara lan pararem désa / banjar, jatma inucap wenang tan kalugrahin suaran kulkul pradé ipun madrebé karya suka-duka.

(5). Risampun keni pamidanda kasampetin suaran kulkul, taler tan sinalinan parisolah, wenang krama inucap kararianang makrama banjar / désa maka tata cara :

1. Sadurung panemaya pasamuhan désa / banjar pacang nguwusang ikrama banjar utawi ubanjaran sané mamurug, patut prajuru désa / banjar nunggal-nunggal ngwéntenang sangkepan ngupadi pamargi rahajeng.
2. Pradé tan mapikolih usaha inucap wawu kawéntenang pasamuhan désa / banjar pacang ngararianang ubanjaran utawi krama banjar inucap.
3. Pamargi angka 2 ring ajeng patut kajarwakang antuk prajuru désa / banjar sajawaning nguwusang krama banjar majalaran pasadok Kelihan Suka Duka maka don sang kawusang tan katampi malih mabanjar sawengkon Désa Adat Kuta.

Pawos 77

Indik panyisip manut pawos 76 ring ajeng kéngin buntas risampun :

- (1). Krama sané rumasa uning ring kaiwangan tan saturut pidaging awig-awig pasuara lan pararem désa / banjar :
 1. Masuaka ring ubanjarania.
 2. Keni sisip anut daging pararem banjar pangwantun kasudamalan Désa saha panyangaskara guru piduka ring Pura Désa miwah ring ulun banjar.
- (2). Swadarmaning prajuru désa / banjar makadi ring sor :
 1. Kelihan Suka-Duka patut nerima pasuakan krama inucap, tur nyadokang ring Kelihan Désa Adat miwah Perbekel / Lurah.
 2. Kelihan Désa Adat nawuhin Kelihan Banjar sami buat nerima pasuakan krama sané nglukuang déwék iwang.
 3. Pradé sampun katinutin sakadi angka 1 ring ajeng, krama inucap wenang katampi tur kajarwakang ring ubanjarania pecak.
- (3). Pamidanda inucap pinara tiga, sabagi ring Kelihan Suka-Duka sané ngwidangin banjar inucap, sabagi ring sang rumawos miwah kas désa sabagi.

SARGA VI

NGUWAH-NGUWUHIN AWIG-AWIG

Pawos 78

- (1). Nguwah-nguwuhin awig-awig Désa Adat Kuta puniki kamargiang antuk pasamuhan désa.
- (2). Pasamuhan inucap mangda kasungkemin antuk pakarsan krama désa.
- (3). Pidaging wah-wuh mangda kadasarin antuk gilik saguluk (pararem).

Pawos 79

Pasamuhan pacang nguwah-nguwuhin awig-awig kadi ring ajeng, kéngin kamedalang antuk Kelihan Désa Adat, Kelihan-kelihan Suka-Duka, yadiastun niri-niri miwah sinarengan.

SARGA VII

PAMUPUT

Pawos 79

- (1). Awig-awig puniki kawastanin Awig-awig Désa Adat Kuta.
- (2). Awig-awig puniki kamargiang ngawit kararemin.

Pawos 81

- (1). Sakaluir sané wénten sadéréngnia patut kaanutang ring sadaging awig-awig puniki.
- (2). Sakaluir sané durung kabawos sajeroning awig-awig puniki patut kalaksanayang manut tata cara sané sampun ketah mamargi kadulurin antuk pararem désa / banjar.

Pawos 82

- (1). Awig-awig puniki kararemin duk rahina Saniscara Umanis, Ingkel Buku, Wuku Watugunung, Tilem Sasih Jyéstha, Saka 1914, tanggal maséhi, 02 Méi 1992, ring Pura Désa.

- (2). Awig-awig puniki kalingga tanganin antuk Kelihan Désa Adat Kuta, kasarengin Kelihan Suka Duka, saha kasaksinin antuk BPPLA Kabupatén Badung, Camat Kuta, Lurah Kuta, miwah Kepala-kepala Lingkungan sawidangan Désa Adat Kuta.
- (3) Luir sané nglingga tanganin, sané kapertama Prajuru Désa Adat Kuta


Prajuru Désa Adat Kuta

Kelihan Désa Adat Kuta



I Déwa Putu Ngurah

Penyarikan




Sang Bagus Madé Réndha

Kelihan Suka Duka Br. Pelasa



I Madé Wijaya

Kelihan Suka Duka Bañjar Temacun




Ida Bagus Putra Suadhi

Kelihan Suka Duka Br. Pemamorán



I Gusti Ketut Sudira

Kelihan Suka Duka Br. Pengabetan




I Nyoman Jati

Kelihan Suka Duka Br. Pering



Sang Bagus Nyoman Dombolan

Kelihan Suka Duka Br. Pandé Mas




I Ketut Atmaja

Kelihan Suka Duka Br. Tegal



I Déwa Ketut Adi

Kelihan Suka Duka Br. Buni



I Nyoman Budi Utama

Kelihan Suka Duka Br. Tebasari

I Ketut Turut

Kelihan Suka Duka Br. Jaba Jero

I Nengah Soma

Kelihan Suka Duka Br. Anyar

I Madé Suléndra

Kelihan Suka Duka Br. Segara

I Wayan Wéna

Kelihan Suka Duka Br. Mertajati

I Wayan Surayaga SH.

Prajuru Dinas Pinaka Saksi :

Kepala Lingkungan Pelasa

I Madé Puja

Kepala Lingkungan Temacun

I Ketut Tirta Yasa

Kepala Lingkungan Pengabetan

I Nengah Suwéca

Kepala Lingkungan Pandé Mas

I Wayan Jati


Kepala Lingkungan Tegal

I Wayan Watta Karang

Kepala Lingkungan Buni

I Nyoman Dolen

Kepala Lingkungan Jaba Jero



I Dewa Ketut Candra

Kepala Lingkungan Segara



I Wayan Karta


Kepala Kelurahan Kuta



I Gusti Adnya Subrata

NIK : P-0865/D


Camat Kuta



Drs. Gedé Nurjaya

NIP: 010078002


BPPLA Kabupaten Badung



A.A. Putu Oka Suwétja, SH.

MENGETAHUI DAN TELAH DICATATKAN :

BUPATI KEPALA DAERAH TINGKAT II BADUNG



I Gusti Bagus Alit Putra

Lepihan :

Awig-awig ring ajeng kakaryanin antuk Panitia, sané kaambilang saking suang-suang banjar sawidangan Désa Adat Kuta, kamanggalain antuk Fakultas Hukum dan Pengetahuan Masyarakat Universitas Udayana Denpasar.

Mungguing susunan Panitia inucap kadi ring-sor :

PANITIA PERANCANG RÉVISI AWIG-AWIG.

NO.	NAMA	JABATAN	ALAMAT
1.	Ida Bagus Putra Suradnya	Ketua	Banjar Temacun
2.	Sang Bagus Madé Réndha	Sekretaris	Banjar Pering
3.	I Wayan Rena	Bendahara	Banjar Pengabetan
4.	I Madé Wijaya	Anggota	Banjar Pelasa
5.	I Madé Puja	Anggota	Banjar Pelasa
6.	I Nengah Mirna	Anggota	Banjar Pelasa
7.	I Gusti Putu Puja	Anggota	Banjar Pelasa
8.	I Gusti Madé Kaler	Anggota	Banjar Pelasa
9.	I Madé Wija	Anggota	Banjar Pelasa
10.	Ida Bagus Putra Suadi	Anggota	Banjar Temacun
11.	I Ke tut Tirtayasa	Anggota	Banjar Temacun
12.	A. A. Rai Budiarta	Anggota	Banjar Temacun
13.	I Madé Raket	Anggota	Banjar Temacun
14.	I Gedé Putu Setiawan	Anggota	Banjar Temacun
15.	I Wayan Dima	Anggota	Banjar Temacun
16.	I Gusti Ketut Sudira	Anggota	Banjar Pemamorán
17.	I Gusti Putu Rai	Anggota	Banjar Pemamorán
18.	I Ketut Jaya	Anggota	Banjar Pemamorán
19.	I Nyoman Jati	Anggota	Banjar Pengabetan
20.	I Nengah Suwéca	Anggota	Banjar Pengabetan
21.	I Wayan Ratna Wijaya	Anggota	Banjar Pengabetan
22.	I. Ketut Nétra	Anggota	Banjar Pengabetan

23.	I Nydran Leding	Anggota	Banjar Pengabetan
24.	I Madé Kawi Arcana	Anggota	Banjar Pengabetan
25.	I Déwa Kompyang Tangi	Anggota	Banjar Pering
26.	I Déwa Ketut Rai Astawa	Anggota	Banjar Pering
27.	Sang Bagus Ketut Moligan	Anggota	Banjar Pering
28.	Sang Bagus Madé Buana	Anggota	Banjar Pering
29.	Sang Bagus Putu Noli	Anggota	Banjar Pering
30.	Déwa Rai Sunu	Anggota	Banjar Pering
31.	I Madé Wéndra	Anggota	Banjar Pandé Mas
32.	I Wayan Jati	Anggota	Banjar Pandé Mas
33.	I Ketut Atmaja	Anggota	Banjar Pandé Mas
34.	I Madé Darsana	Anggota	Banjar Pandé Mas
35.	I Wayan Kariyasa	Anggota	Banjar Pandé Mas
36.	I Wayan Lasia	Anggota	Banjar Pandé Mas
37.	I Wayan Dana	Anggota	Banjar Pandé Mas
38.	I Madé Artana	Anggota	Banjar Pandé Mas
39.	I Ketut Wenda	Anggota	Banjar Pandé Mas
40.	I Ketut Rujana	Anggota	Banjar Pandé Mas
41.	I Madé Mastra	Anggota	Banjar Pandé Mas
42.	I Ketut Lénju	Anggota	Banjar Pandé Mas
43.	I Wayan Warta Karang	Anggota	Banjar Tegal
44.	I Déwa Ketut Adi	Anggota	Banjar Tegal
45.	Drs. I Madé Suwéja	Anggota	Banjar Tegal
46.	I Nyoman Sénter	Anggota	Banjar Tegal
47.	I Madé Nadi	Anggota	Banjar Tegal
48.	I Nyoman Budi Utama	Anggota	Banjar Tegal
49.	I Nyoman Dolen	Anggota	Banjar Tegal
50.	I Wayan Madri	Anggota	Banjar Tegal
51.	I Wayan Béker Arnawa	Anggota	Banjar Tegal

52.	I Nengah Sorna	Anggota	Banjar Jaba Jero
53.	I Déwa Ketut Candra	Anggota	Banjar Jaba Jero
54.	I Déwa Madé Oka Wijaya	Anggota	Banjar Jaba Jero
55.	I Nyoman Supatra	Anggota	Banjar Jaba Jero
56.	I Ketut Peling BA.	Anggota	Banjar Jaba Jero
57.	I Ketut Turut	Anggota	Banjar Tebasari
58.	I Wayan Pasek	Anggota	Banjar Tebasari
59.	I Madé Wastika	Anggota	Banjar Tebasari
60.	I Wayan Sadi	Anggota	Banjar Tebasari
61.	Drs. I Nengah Cipta	Anggota	Banjar Tebasari
62.	I Nyoman Ringganata	Anggota	Banjar Tebasari
63.	I Nyoman Yasa	Anggota	Banjar Tebasari
64.	I Wayan Yasa P.	Anggota	Banjar Tebasari
65.	I Madé Suléndra	Anggota	Banjar Anyar
66.	I Wayan Darma	Anggota	Banjar Anyar
67.	I Wayan Karthana	Anggota	Banjar Segara
68.	I Wayan Kondra	Anggota	Banjar Segara
69.	I Wayan Wéna	Anggota	Banjar Segara
70.	I Ketut Suartana	Anggota	Banjar Segara